

لينا بسيوني



قصة قصيرة

معجزة صديقي

الغرافرة – الوادى الجديد

كنا فى رمضان ساعة الفطار فرشنا الارض , وكل واحد منا حط سلاحه جمبه , فيه الى كان بيصلى , وفيه الى كان بيشرى ميه بشراهه بعد الشمس مانشفتنا طول النهار.

فوجئنا بعربيه سودا بتجرى ناحينا ونط منها ارهابى لابس حزام ناسف ورعى نفسه علينا وأحنا بنفطر , نطينا من جمبه بسرعه , وكل واحد مسك سلاحه وخذنا أستعداد للهجوم والى بدأ من عربيه تانيه بيضا .بعدها هجم علينا سيل من العربيات ونزل منها عدد من الإرهابيين بالرشاشات الالى وباسلحه الاربى جى , قاومنا وقتلنا منهم وقتلوا منا بس كانوا كثيره وضربوا فى ساعة غدر, والكتره تغلب الشجاعه.

غربلوا الكمين وخذوا عربياتهم وهربوا.

كل اصحابنا الى فى الكمين ماتوا محدش بيتحرك مفيش غيرى لسه عايش.

كنت متصاب برصاصه فى رجلى منعنى انى أتحرك.

شوفت جثه واحد زميلي بتتحرك وبيقوم من تحتها مينا واللى كان متصاب هو كمان فى كتفه.
رفعتله أيدى فجرى عليا , بس وهو بيجرى عليا شاف عربيه تانيه من عربياتهم جاية من بعيد
فشالنى على كتفه وجرى بيا!!!!

مينا جسمه ضعيف وزنه مايعديش ال70 كيلو , اما أنا وزنى كان وقتها ممكن يعدى 120!!
مينا شالنى وكتفه بينزف وجرى بيا بسرعه فى الصحرا والمسافه اللى جريها وهو شايلىنى كانت
كبيره جدا , وجريها فى لمح البصر وبسرعة الصاروخ...مسافه كبيره لدرجة أننا مابقناش
شايفين ملامح للطريق اللى حوالينا , مفيش غير صحرا وجبال بس!!

حطنى على الرمل وبص حواليه وقالى:

أنت مبروك ولا أيه؟! أحنا جينا هنا أزاى?!!

فقولتله:

أنت اللى جبتنا!!؟ المفروض انا اللى أسألك عملتها أزاى دى!!!

مالقناش تفسير وقعدنا نبص لبعض بأستغراب , فقالى:

طيب هنرجع أزاى دلوقتى أحنا فى نص الصحرا!!!

قولتله:

حاول تشيلنى تانى ونرجع للطريق.

حاول يشيلنى تانى مقدرش يحركنى من مكانى!!!

وقالى:

أنت تقيل أوى ... أنا مش عارف أحركك!!! بص حاول كدا تتسند عليا وتقوم نشوف أى حته

نضلل تحتها، الشمس هتسيحنا وهتصفي دمنا.

حاولت بالعافيه أتحرك على رجل واحده وسندت عليه وأتمشينا شويه لحد مالقينا على مرى

بصرنا شجره فى نص الصحرا!!

كنا بتمشى شويه وبعدين نقف نريح شويه لحد ما وصلنا للشجره.

قعدنى مينا وسند زهري على الشجره وشق قميصه وقطعه شرايط , ربط كتفه بالشرايط

وهو بيقولى:

الرصاصه بتاعتي نفدت من الناحيه التانيه الحمد لله.

ونزل بص على رجلى وقالى:

الرصاصه بتاعتك وقفت فى عضم رجلك من جوه لازم نطلعها , شوف زمميتك فيها ميه أد

أيه وطلع كل حاجه فى جيبك يمكن نستفاد بيها.

قولتله:

زمزاميتى مليانه.. وطلعت كل اللى فى جيبى كان محفظتى ووصل أستلام فلوس من البوسطه

وسيجاره كليوباترا فرط.

قالى:

فین الولاغه اللى بتولع بيها !!؟

قولته:

أخخ.. الواد على قلبها منى..

قالى:

ده قلب ولاعتى انا كمان..

قولنا فى صوت واحد يابن الكل....

مكملناش وبصينا لبعض بحزن لما أفكرنا أنه أستشهد فى الكمين.

قالى:

انا زمزاميتى مليانة زيك و مش معايا غير سكينه السلاح بس.

قولتله:

معنى كده أننا هنموت هنا.

قالى:

لا مش هنموت لو ربنا عايزنا نموت كنا متنا من ساعه، أنما ربنا جابنا هنا لحكمه.

ولقيته بيحفر حوالين جزع فى الشجره بالسكينه.

قولتله:

بتعمل أيه ؟

قالى:

هطلع حتة خشبه كبيره من الشجره وأعمل نار.

قولتله:

هتطلع خشبه كبيره بالسكينه التلمه اللى معاك دى أزاى..

قالى:

هقعد أحفر فى جزع الشجره بالسكينه لحد ما يتكسر .. هبقى أريح كل شويه.

قولتله:

طيب هتعمل نار أزاى؟!!

قالى:

هبقى أوريك

وبالفعل بقى كل شويه يقوم يحفر فى الشجره وبعدين يريح شويه.

قالى وهو بيبتكر ويبتسم:

فاكر لما كنا صغيرين وخليتى أحفظ اسماء الله الحسنى وأقولها معاك فى الاذاعه المدرسيه!!

انا ومينا من يوم ماتولدنا وأحنا جيران .. أها صح نسيت أقولك أنا أسمی محمد أحمد.

وزی ماكنت بحكيك، انا ومينا روحنا الحضانه والابتدائی مع بعض وكان الناس دايمًا
بیشوفونا مع بعض , مكناش نعرف یعنی أيه مسلم أو یعنی أيه مسیحی , كنت بسأله عن
الصليب اللى فى بيتهم وكان بیسألنى عن المصحف اللى بيتنا.

لحد ماكبرنا واتفرقنا عن بعض هو بقى لیه أصحابه اللى بيلعب معاهم و بیروح معاهم
الكنيسه وأنا بقى لیا أصحابی اللى بلعب معاهم و بروح معاهم الجامع , شويه شويه مابقيناش
نكلم بعض غير يادوبك سلام بالأشاره من غير صوت , لحد الصدغه ما جمعتنا فى نفس
الکمین , ومكناش بنکلم بعض برده سلامات و بس!!

مينا قاعد عمال يحفر فى جذع الشجره بالسکينه التلمه.

فقولته:

هو احنا مكناش بنکلم بعض لیه؟

قالى:

معرفش , ممكن كنا صغیرين وعاقلين ولما كبرنا أتعلمنا وبقينا حمير.

قولتله:

هى الشمس ضربت دماغك , أنت بتقول أيه !!؟

قالى:

احنا كده ؟

قولته:

أنتوا مين !!؟

قالى:

لا قصدى أحنا البنى آدمين , أول ما بنكبر بنصنف نفسنا و بنصنف غيرنا , فبتلاقى اللى بقى
زملكاوى واللى بقى اهلاوى , وبعد كده تلاقينا بنتخانق مع بعض وممكن مانكلمش بعض
علشان بس أنت بتشجع فريق منافس , مابالك بقى بالدين اللى بيكون الشخصيه نفسها!!

قولته بمكر:

بس معروف مين صح ومين غلط ؟

قالى : كل الديانات صح طول ما بتدعو للخير والمحبه وعبادة ربنا.

ومن الاخر يا محمد كله واحد مقتنع بان دينه هو بس اللى صح مع أننا كلنا صح طول ما أحنا
بنتعامل بفطرتنا ،زى لما كنا صغيرين، وبلاش كلام فى الدين ، لاني لو كنت أتولدت فى بيت
مسلم كنت هبقى مسلم وانت لو كان أبوك مسيحي كنت هتبقى مسيحي، وسواء كنت مسلم
او مسيحي اكيد عارف الخير من الشر.

قولته:

فكرتني بأغنية محمد منير اللى بتقول

لا يهمنى اسمك ولا يهمنى عنوانك.....

كمل مينا وغنى معايا وقال:

يهمنى الانسان ولو مالوش عنوان.....

قدر يقطع جذع الشجره وكملى عليه بأيده وكسره, و قعد يقطع منها عصيان رفيعه و براها
بالسكينه لحد ما خلاها فى رفع وطول القلم الرصاص وخذ حبة نشارة الخشب، و حطها فوق
حتة خشب صغير مسطحه.

حط العصايا بين كف أيديه الاتنين كأنه هيسقف ووقفها فوق نشارة الخشب ، وقعد يبرم
العصايه بأيده ، فضل يبرم فيها كتير على أمل الحركه تسخن نشارة الخشب ويولع ، وبعدين
تعب وادانى أبرم على مايريح شويه ، أول ما أخذتها وبرمت ولعت على طول وطلعت دخان

!!!!

بصلى بأستغراب وقالى:

أنت مبر.....

قطعت كلامه وقولتله:

يناولنى ايصال البريد الورق علشان نغذى النار ، ادانى الايصال فرميته فى الدخان والنار بدأت

تطلع رمينا بسرعه خشب فالنار طلعت أكثر قعدنا نهلل ونحضن فى بعض

قولته:

جامدة حركة النار دي.. اتعلمتها فين؟!!!

قالى وهو بيحط السكينة على النار:

أتعلمتها فى كشافة الكنيسة...

فقولته : هو أنت أهلاوى ولا زملكاوى يا مينا؟

فقال:

زملكاوى

فضحكت وقولته:

مسيحى وزملكاوى!!

جاب السكينة اللى بقى لونها أحمر جمر وقالى:

مسيحى وزملكاوى وهعلم عليك.

فقولته:

هتعمل أيه بالسكينة دى!!!

قالى : هطلع الرصاصه يا أهبل ، أمسك نفسك.

ممسكتش نفسى وأغمى عليا.

فوقت لقيت ميئا نايم جمبى وأول ما فتحت عيني ندهت عليه بصوت تعبان

صحى مفزوع من نومه وقالى:

يخريبتك نشكر ربنا أنك لسه عايش ، فكرتك بتودع!!

شربنى ميه ، فقولته:

جعان...

قالى:

من عنيا هقوم ألكم صبحى كابر يجيبلنا نص كيلو طرب وربع نيغه!!

يابنى أنت مش شايف أحنا فين ، ده أنا هموت من الجوع وكنت بفكر ألك وأنت نايم.. بهزر

طبعاً ، مش هينفع ألك علشان صايم صيام العزرا.

ضحكت بس جسمى شد عليا.

قالى:

شكلنا هنموت من الجوع يا صاحبى.

دعيت وقولت:

يارب جعائين يارب أبعثنا من عندك.

فجأه حسينا بحركه جمبنا أتخضينا وخوفنا ، بس عيننا مكانتش مصدقه اللى شوفناه قدامنا.

أرنب فى الصحرا!! وواقف فى الظلمة قدام النار اللى عاملينها كأنه بيقولنا كلونى!!

قالى:

يا معجزاتك يا محمد!!!

ومد ايده وقفش الارنب وماسماش عليه ذبحه وسلخوه وقعدنا نشويه على النار.

من جوعنا أكلناه قبل مايستوى , وكان هاین علينا نقرقش العضم.

بعد ما مينا أكل , قعد يستغفر ربنا , قولتله : بتستغفر ربنا ليه ؟

قالى: أصلى صايم ياخى!

قولتله:

تصدق , أستغفر الله العظيم , أنا كلت ومخدش بالى من الصبح اللى طلع.

وبعدين ياعم أكيد ربنا هيغفرلنا أحنا كنا هنموت من الجوع , تعرف نفسى فى أيه ؟!

قالى:

ايه ؟!

قولته : كوابية شاي وسيجاره علشان أسيح الارنب فى مع...

قطعت كلامى لما أفكرت السيجاره الكليوباترا الى معايا وقعدت أدور عليها حواليا.

بصيت على النار الى قدامى لقيت مينا واقف بيولعها فى النار وهو بيغظنى وبيقولى:

بتدور على حاجه.؟!!

قولته:

نفس يامينا والنبي خرمان..

قالى:

أبدا قول الزمالك نادى القرن وأنا أسيلك نفس.

قولته:

على رقبتى ومسيرى فى يوم همشى على رجلى وساعتها هطفى السيجاره فى....

خد 3 أنفاس ورا بعض من السيجاره أبى اللذينا هيخلص السيجاره لوحده , مد أيده وادهالى

فى نصها وقالى:

خلاص ياعم متقفش كده , خد الباقي ليك.

خطفت من أيده باقى السيجاره وأتمزكت بيها نفس نفس وبراحه.

ريقى نشف فطلعت الزماميه بتاعتى لقيتها خلصت!!!

قوت لمينا الميه بتاعتي خلصت , فآداني الزمزميه بتاعته ومكنش فيها الا حبه صغيرين

خالص , قولته:

مفيش غير بوق صغير!!

قالى:

أشربه أنت جسمك محتاجه أكثر منى , وبعدين انا مش عطشان.

قولته:

مش هينفع يامينا ده اخر بوق ميه!!

قالى:

صدقنى مش عطشان ...أشرب يا محمد علشان ماتهبطش منى والوص بيك.

بليت ريقى بس وسيت قطرات ميه فى الزمزميه.

قولته:

وبعدين يا مينا هنموت كده!!!

قالى:

طيب ماتدعى يامبروك يمكن ربنا يطلعنا من هنا!!

فتحت دراعى وغمضت عيني وعملت زى الشيخ جبريل وقولت يارب طلعا من هنا ياالله
يارب , يارب أنقذنا يارب يا الله.

بس محصلش حاجه!!!

فقولتله:

ماتدعى أنت يامينا هو أنا اللى هعمل كل حاجه!!!

فمسك الصليب اللى فى أيده وحرك شفايفه بكلمات مفهمتهاش أوى.. بس سمعته بيقول
يارب نجينا!!!

مالحقش يسيب الصليب من أيده ولقينا الدنيا بتمطر وبترخ علينا ميه فى عز الحر والشمس
طالعه!!!

مدينا كل واحد زمزيتيه , الدنيا مطرت لحد ما ملت زمزيتنا بالضبط وبعدها وقفت!
قولتله وانا بقربع من الزمزيه بتاعتى علشان أروى عطشى:
انا....الى مبروك برده.

عدت ساعات قليله خلصت فيه زمزمياتنا بسرعه , والشمس قربت تحرق عضمنا بعد
مانشفت جلدنا.

قولتله وانا خلاص جسمى بينهار من الجرح والعطش والجوع:

أدعى يا مينا ربنا ينجينا..

قعد يدعى كتير وهو ماسك الصليب , بس مفيش حاجه بتحصل , الدنيا مبقتش تمطر .

مفيش أرنب تانى جه.

مفيش أكل أو شرب . شفايفنا شققت وجسمنا خلاص بيموت

قالى:

أدعى انت المره يا محمد.

غمضت عيني وقعدت أدعى وانا بعيط أن ربنا ينجينا , لحد صوتنا أحنا الاتنين مابدأ يضعف

من الوهن اللى صاب جسمنا!!

قولت بصوت ضعيف ليه يا رب بتموتنا بالبطيء بعد ما انقذتنا ؟ !! كنت سيبتنا نموت مع

زمايلنا.

فرد علي مينا وقال:

كل الاشياء تعمل معا للخير للذين يحبون الله.

قولتله:

يعنى أيه ؟!!

قالى:

زى مابتقولوا عندكم عسى أن تكرهوا شيئاً وهو خير لكم ... ماتيجى نجرب ندعى مع بعض.

مسك صليبه وفتحت أيدى وقولنا فى صوت واحد:

يارب نجينا يارب...

بعدها غيبنا أحنا الاتنين عن الوعى.

.....

سمعت صوت طياره هليوكوباتر بيقرّب علينا , فتحت عيني وقعدت أهز فى مينا اللى نايم

جمبى وأنا مبتسم وبقوله:

ربنا أستجاب لدعوتنا مع بعض مردش عليا ونفسه مكانش طالع.

قعدت أحرك فيه وأهز فيه جامد وأنا بقوله:

فوق يامينا ربنا نجانا أهوه ... متمتش يلاه .. متمتش ياد والنبى.

ماتحركش برده!!!

قعدت أدوس على صدره بايدى بحاول انعش أو أرجع نفسه تانى .. مكنتش عارف أعمل أيه

!!!

قعدت أعيط جمب جثته.....

فجأة لقيته شهق شقهة كأن ردت فيه الروح!

سمعت صوته والى كانت طالع بالعافيه وقال جمله ماسمعتهاش.

الطياره الهليكوباتر قربت مننا وبقت فوقينا وصوتها غطى على صوته الضعيف.

ما صدقتش نفسى أنه لسه عايش , قربت ودنى من بوقه علشان أسمع به يقول أيه , لقيته

بيقول:

الزمالك قادم وضحك ضحكه طلعت مع كحة.

خبطه فى كتفه المتصاب فقال اه وشتمنى.

قلتله خضبتنى عليك يا بن اللذينة .. كانت هتبقى قفله وحشه لو مت يا صاحبى.

دعايا استجاب ودعاء مينا استجاب , وجمعتنا معجزه بعد ما فرققتنا ايام وفتن , عرفنا

واتعلمنا حكمة من المعجزه اللى حصلت ... ياترى عرفت انت كمان الحكمة كانت ايه؟

اهداء الى صديقتى كريستينا , لانها تعلم لماذا

تمت